

M198: Vom Rechte

0,1 nieman ist sô hêre .
0,2 sô daz reht ze wâre .
0,3 wan got ist ze wâre .
0,4 ein rehter rihtære .
0,5 von diu hiez er den sînen kneht .
0,6 vile starke minnen daz reht .
0,7 daz er nâch im vienge .
0,8 unde sîn reht begienge .
0,9 wan mit im ne mac nieman gestân .
0,10 er ne welle daz reht hân .
0,11 wan er scheidet die unrehten .
0,12 von sîn selbes knehten .
0,13 der rehte sint vile manigiu .
0,14 unde besliezent alliu sament driu .
0,15 unde begiengen wir diu .
0,16 wir mohten iemer genuoc haben .
0,17 unde mohten mit allen êren leben .
0,18 ein reht daz sint die triuwe .
0,19 dâr wir mit schulen bûwen .
0,20 ein ander reht daz ist alsô getân .
0,21 daz wir – – uns selben wellen haben .
0,22 daz solten wir einandern geben .
0,23 wolten wir kristenlîchen leben .
0,24 wir solten sîn gewære .
0,25 daz wære michel êre .
0,26 der diu driu reht behabet .
0,27 die wîle daz er nû lebet .
0,28 unz an sînen tô .
0,29 dem hülfe got von der nô .
0,30 ez wære man oder wîp .
0,31 er gebe im den êwigen lîp .
0,32 der dâ niemer zergât .
0,33 unde iemer êwic stât .
0,34 daz wir hier ze rehte wellen hân .
0,35 der ist decheinez sô getân .
0,36 wir werfen eben alle .
0,37 swie uns gevellet .
0,38 mannegelîch swie er wile .

0,39 des ist allez ze vile .
0,40 mannegelîch sînen vriunde niht gestât .
0,41 als er in geminnet hât .
0,42 bî des iegelîcher sînen muotwillen gekôset .
0,43 sô stât daz reht verbôset .
0,44 mannegelîch wile reht hân .
0,45 als sîn gewalt ist getân .
0,46 unde wile daz im selbem haben .
0,47 und wile ez decheinem anderen geben .
0,48 der site der sint drî .
0,49 dô ist rehtes niht bî .
0,50 dâr an wellent si gestân .
0,51 von diu wirdet des armen rede vile unrehte getân .
0,52 die scheident ouch ze wâre .
0,53 von dem rehten rihtære .
0,54 wan swelicher den gewalt hât .
0,55 unde er daz unrehte begât .
0,56 unde er ez über einen anderen dolet .
0,57 dâ mit hât versolt .
0,58 den êwigen lîp .
0,59 ez sî man oder wîp .
0,60 er ne welle sich es bûezen .
0,61 unde welle ez gare verlâzen .
0,62 daz er niemer mêrer getuo .
0,63 daz reht hoeret dâr zuo .
0,64 hât er sich verwandelt .
0,65 sô verkiuset ez got .
0,66 alsô müge er werden gotes kneht .
0,67 kêren aber an daz reht .
0,68 dâ vernement algelîche .
0,69 nieman ist sô rîche .
0,70 er müeze den rîchtuom verlân .
0,71 unde muoz sîn ane gestân .
0,72 swie der man daz geholet .
0,73 daz got daz verdolet .
0,74 daz im sîn rîchtuom zergât .
0,75 daz er sîn niweht hât .
0,76 sweder daz verbrinnet .
0,77 daz der man gewinnet .
0,78 oder er wirdet beroubet . sîn
0,79 rîchtuom sô getoubet .
0,80 sweder ez versinket
0,81 in dem wazzet ertrinket .
0,82 oder sus kumet ein unheil .
0,83 unde en leibet im sîn decheinem teil .
0,84 oder in begrîfet der tât .
0,85 sô lât er ez danne durch got .
0,86 swenne ez got niht mêrer wile bewaren .

0,87 sô lẫt er ez noeten varen .
0,88 sô geloubet er allerêrste sînem knehte .
0,89 sô rihtet got rehte .
0,90 wan er uns nimet unde lẫt .
0,91 als er des gewalt hât .
0,92 beidiu lûtzel unde vile .
0,93 daz tuot er alsô dicke sô er wile .
0,94 unz ez alsô ergât .
0,95 daz der man niweht hât .
0,96 sô hât der meister und der kneht .
0,97 beidesam ein reht .
0,98 ich weiz si ensament hin gânt .
0,99 ein riute bestânt .
0,100 si riutent mit den armen .
0,101 daz mohte uns wole erbarmen .
0,102 daz der rîche man zergât .
0,103 daz er niht en hât .
0,104 daz sage ich iu wie daz stât .
0,105 daz der rîche man zergât .
0,106 durch daz michel guot .
0,107 er kêret hôhe sînen muot .
0,108 er vûrhtet niht den tât .
0,109 im erbarmet niemannes nỗt .
0,110 die übermuot er hin treit .
0,111 daz er si nider niene leit .
0,112 unz an den tac .
0,113 daz danne kumet der gotes
0,114 sô ist dechein burc sô veste .
0,115 geworht ûzer listen .
0,116 si ne werde zerstôrt .
0,117 gare zevûeret .
0,118 ez ist doch umbe den gotesslac sô getân .
0,119 dâ ne mac niht vore gestân .
0,120 sich mûgen die hôhen mûren .
0,121 niender dâ vore behûeten .
0,122 in decheiner veste .
0,123 mit decheinem liste .
0,124 dâ kêren aber an daz reht .
0,125 dâ der meister unde der kneht .
0,126 beidesam hin gânt .
0,127 unde die ruoten bestânt .
0,128 die kleinen stocke . si ûz nement .
0,129 unz si an den grôzen koment .
0,130 des kraft ist alsô getân .
0,131 des mûezen si arbeit hân .
0,132 wel si des beginnen .
0,133 daz si in ûz der erde bringen .
0,134 daz schulen si tuon mit ringene .

0,135 die dremele dâr in stôzen .
0,136 den harten sweiz lâzen .
0,137 als ez umbe den harten man stât .
0,138 der daz unreht begât .
0,139 swer den wile bekêren .
0,140 der muoz in rehte lêren .
0,141 er muoz in starke dwingen .
0,142 an daz reht bringen .
0,143 alsô der riutære vile guot .
0,144 dem vile grôzen stocke tuot .
0,145 der in des dwinget .
0,146 daz er in von der erde bringet .
0,147 wan lieze er in dâ stân .
0,148 sô wære daz riuten ungetân .
0,149 er bedorfte daz ertîsen .
0,150 niemer dâr gewîsen .
0,151 daz îsen dâr in steche .
0,152 den pfluoc ez zebreche .
0,153 alsô umbe den rîchen man stât .
0,154 der daz unreht begât .
0,155 den mac nieman bedwingen .
0,156 an dechein reht bringen .
0,157 ez ne tuo got der guote .
0,158 mit etelîcher noete .
0,159 oder ez aber eteswie sô kome .
0,160 daz er in von der kristenheit neme .
0,161 daz diu kristenheit gestê .
0,162 daz si niene zergê .
0,163 sâ kêren . aber an daz reht .
0,164 dâ der meister unde der kneht .
0,165 beidesam hin gânt .
0,166 unde die ruoten bestânt .
0,167 sô ez danne ze diu wirdet .
0,168 daz diu ruote gebiret .
0,169 si sulen ez vuoren sament heim .
0,170 teilen ez allez enzweie .
0,171 wel si rehte gevaren .
0,172 si schulen sich vile wole bewaren .
0,173 daz ir newederem werde mêrer .
0,174 wande si arnent ez beide sêre .
0,175 si habent ez mit ire sweize gewonnen .
0,176 ez bedarf ir einwederz dem anderem entbunnen .
0,177 alsô getân leben .
0,178 solten wir allensament haben .
0,179 swer ze genâden wile komen .
0,180 der sol nieman niht nemen .
0,181 er sol ouch nieman nihtes erbunnen .
0,182 des er mit rehte hât gewonnen .

0,183 sô sol der hêrre unde der kneht .
0,184 minnen daz selbe reht .
0,185 wel si rehte gevaren .
0,186 ieweder sol den anderen bewaren .
0,187 über alle sîne nôt .
0,188 unz an sînen tôt .
0,189 sô lebent si beide rehte .
0,190 die hêrren unde die knehte .
0,191 die vrouwen joch die diue .
0,192 die schulen haben triuwe .
0,193 wederz ist diu vrouwe .
0,194 daz ist diu triuwe .
0,195 diu gewarheit und ouch diu triuwe .
0,196 die gedâhten einer diuwe .
0,197 der hêrre an daz reht .
0,198 hiez dô werden einen kneht .
0,199 er worhte in ûzer nihte .
0,200 er worhte ze einem innerlîchem liehte .
0,201 daz er vore im wære .
0,202 unde im licht bere .
0,203 dô greif er an die übermuote
0,204 daz was ze nihte guot .
0,205 der hêrre behielt daz reht .
0,206 dô verstiez er den kneht .
0,207 in ein ellende .
0,208 hin in daz apgründe .
0,209 von diu sô ne sol dechein vrouwe .
0,210 gestaten ire diuwe .
0,211 daz si sie vore lâze gân .
0,212 swie schône ire varwe sî getân .
0,213 noch der hêrre sînem knehte .
0,214 daz kom von dem rehte .
0,215 daz der allerhêrest kneht .
0,216 geviel an daz unreht .
0,217 wile der hêrre unde der kneht .
0,218 beide minnen daz reht .
0,219 sô sagent diu buoch ze wære .
0,220 si werdent ebenhêre .
0,221 wile diu vrouwe und diu diuwe .
0,222 minnen die triuwe .
0,223 sô sagent diu buoch ze wære .
0,224 si werdent ebenhêre .
0,225 swie wole der man sî geboren .
0,226 wile er unrehte varn .
0,227 vert er unrehte .
0,228 er hât daz reht der knehte .
0,229 ist diu vrouwe ungetriuwe .
0,230 si hât daz reht der diuwe .

0,231 die schalke unde die diuwe
0,232 minnent si die triuwe .
0,233 ire armuot sint nie sô grôz .
0,234 die werdent der hêresten genôz .
0,235 swer dâ minnent daz reht .
0,236 ez sî hêrre oder kneht .
0,237 der muoz ie hin vûre gân .
0,238 der ander hinder im gestân .
0,239 nieman ist sô here .
0,240 sô daz reht ze wâre .
0,241 des megen wir uns wole entstân .
0,242 swâ wir ze rehte schulen gân .
0,243 swie harte sich der müejet .
0,244 der daz îsen glüejet .
0,245 unde ez danne hin treit .
0,246 einem an die hant leit .
0,247 ist er rehte dâr komen .
0,248 daz hân wir dicke wole vernomen .
0,249 daz viur in niene brennet .
0,250 wie wole in got erkennet .
0,251 wie verre er dâ gelobet stât .
0,252 der daz reht dâ begât .
0,253 sô sint si alle betrogen .
0,254 die in an habent gelogen .
0,255 swie ez dâr nâch gevare
0,256 sô ist ir iegelîchem gare .
0,257 ein îsen alsô heiz .
0,258 daz ir necheiner weiz .
0,259 rehte an die hant .
0,260 daz brennet als ein brant .
0,261 heie wie ez dem glüejet .
0,262 der in unschuldigen müejet .
0,263 der in des bedwinget .
0,264 an daz reht bringet .
0,265 von diu sint die lügenære .
0,266 gote vile unmare .
0,267 swâ diu lüge in dem dorfe gât .
0,268 daz ze dem vrumen si bestatet .
0,269 wile er minnen daz reht .
0,270 er heizet swîgen sînen kneht .
0,271 er heizet swîgen sîniu kint .
0,272 unde alle die under im sint .
0,273 er heizet swîgen sîn wîp .
0,274 unde gebiutet ir an den lîp .
0,275 daz ez verrer niene kome .
0,276 daz ez ieman verneme .
0,277 sint ouch diu laster gewære .
0,278 daz ist michel êre .

0,279 daz man dâ von wende .
0,280 unde nieman schende .
0,281 swer redet grôze unde vremede schande .
0,282 daz sint unantlæzlich sünde .
0,283 swie wole sich der man hât bewart .
0,284 dâ mit hât er erbart .
0,285 daz er im selben ein urkünde tuot .
0,286 daz er ne ist reht noch guot .
0,287 wan mohte sich mennischlich ersehen .
0,288 im wære eteswaz geschehen .
0,289 der des rede wolte hân .
0,290 daz vile übele wære getân .
0,291 daz im vile liep wære .
0,292 daz man daz verbere .
0,293 daz man dâ von wante .
0,294 unde nieman schante .
0,295 von diu sint die itewîzære .
0,296 gote vile unmære .
0,297 mannegelîch sol hin gân .
0,298 sehen waz er selbe habe getân .
0,299 unde sol sich selbe des bewarn .
0,300 unde sol einen anderen verbern .
0,301 er ne sage iz im durch guot .
0,302 gesach in got der ez tuot .
0,303 nieman ist gotes kint .
0,304 wan die daz reht wûrkente sint .
0,305 die anderen sint von den gesundert .
0,306 vile ist des mich wundert .
0,307 daz sich der hunt arcman .
0,308 niht verdenken kan .
0,309 “diu erge daz ist schande .
0,310 diu ist laster und sünde .”
0,311 swenne der arge man zergât .
0,312 daz er des lîbes niene hât .
0,313 sô riuwet in sîn rîchtuom .
0,314 er ne hât den lôn noch den ruom .
0,315 sô stât er in der helle .
0,316 ez wunder waz der gotessun sîn zuo der kristenheit welle .
0,317 liez in einen heiden wesen .
0,318 er mohte alsam wole genesen .
0,319 wan unmæzige erge .
0,320 ist gruntveste aller übele .
0,321 nieman ist sô hêre .
0,322 sô daz reht ze wære .
0,323 der meister ist guot .
0,324 der selbe guotiu werc tuot .
0,325 unde den kneht sô mit heizet varen .
0,326 der wile den tumben bewaren .

0,327 wan der meister des iemer lôn hât .
0,328 swâ der kneht daz reht begât .
0,329 wande er iemer vore vert .
0,330 der die reise dâ büret .
0,331 unde man im daz lop gât .
0,332 der bedenket sich enzît .
0,333 daz er reht vore vare .
0,334 unde die menige beware .
0,335 swelicher sô welle .
0,336 der var hin ze helle .
0,337 heize sîn knehte mit varn .
0,338 dâ sint si alle mit verloren .
0,339 dâ habent si beide unreht .
0,340 beidiu meister unde kneht .
0,341 daz unreht ist daz leit .
0,342 ich zele iu die wârheit .
0,343 wande ez ungemechlich enwec gât .
0,344 doch ez manic man hât .
0,345 nieman ist sô hêre .
0,346 sô daz reht ze wâre .
0,347 wande sich got selbe vermaz .
0,348 dô er in sînem wîstuome saz .
0,349 dâ er selbe saz unde lêrte .
0,350 die kristenheit bekêrte .
0,351 swâ zwêne zesamene giengen .
0,352 unde an daz reht viengen .
0,353 daz er der dritte wolte sîn .
0,354 daz ist ein michel güeten .
0,355 sament in sitzen unde stân .
0,356 unde daz reht begân .
0,357 von diu sol der man unde daz wîp .
0,358 sîn als ein lîp .
0,359 wande die dicke sament stânt .
0,360 unde sitzent unde gânt .
0,361 zwei sament in bette gânt .
0,362 zwei an dem rehte gestânt .
0,363 got müge vile wole sîn .
0,364 under ir beider decken .
0,365 der dritte geselle .
0,366 sweliche sô welle .
0,367 der widerrede daz .
0,368 der kan diu buoch bazzet .
0,369 der ieweders sol sîn ze wâre .
0,370 des anderen sêle kamerære .
0,371 als ez des rede wile hân .
0,372 dô si ze jungest schulen erstân .
0,373 wande uns saget der geloube hêre unde stæte .
0,374 der ervüllet alle guottæte .

0,375 daz wir ze jungest schulen erstân .
0,376 mit dem bilede unde wir hiute hier schînîc gân .
0,377 mit dem vleische unde mit dem gebeine .
0,378 alle gemeine .
0,379 diu sêle ist daz dritte reht .
0,380 alsô worhte got sînen kneht .
0,381 nâch sînem bilede getân .
0,382 unde hiez in sîn reht hân .
0,383 unde greif im an sînen lîp .
0,384 unde hiez im werden ein wîp .
0,385 ûzer einem sînem rippe .
0,386 alsô ist diu werlt sippe .
0,387 daz wîp kom von dem manne .
0,388 si schol im sîn gehôrsam .
0,389 si wart genomen von sînem lîbe .
0,390 von den schulden sô gât der man noch nâch dem wîbe .
0,391 daz er si des bedwinge .
0,392 in sîne gewalt bringe .
0,393 mit wiu sol er si dwingen .
0,394 niuwan mit rehten dingen .
0,395 mit rehter gemahelen .
0,396 sô sol si sîn kone sîn .
0,397 er ist Karl dâ si ist kone .
0,398 daz ist ein vile altiu gewone .
0,399 daz kint daz ist daz dritte reht .
0,400 alsô hiez got sînen kneht .
0,401 den wuocher bringen .
0,402 daz kom von alten dingen .
0,403 bûwen dise wüesten .
0,404 daz sol des mennischen reht noch sîn .
0,405 daz ervüllet werde .
0,406 der himel joch diu erde .
0,407 iz ist rehte daz der leie .
0,408 eine kone eige .
0,409 unde er ir rehte mite vare .
0,410 unde ein ander verbere .
0,411 ez ist rehte daz daz junge wîp .
0,412 vile wole ziere den ire lîp .
0,413 diu sol einen man haben .
0,414 dem si ire vriunde wellen geben .
0,415 unde sol dem rehte mite varn .
0,416 unde sol einen andern verbern .
0,417 der ist der zweier meister .
0,418 daz sol sîn der priester .
0,419 der sol sîn ze wâre .
0,420 ir voreleitære .
0,421 der meister sol wole gezogen sîn .
0,422 er sol vile unbetrogen sîn .

0,423 er sol sîn durhnehte .
0,424 gerne sol er werben rehte .
0,425 daz ist diu gotes êre .
0,426 daz er daz den kneht lêre .
0,427 ist der meister iht betrogen .
0,428 sô wirdet der kneht ungezogen .
0,429 der uns dâ vore sol varen .
0,430 der sol daz unreht verberen .
0,431 daz der tumbe lei .
0,432 dâr nâch niene zeige .
0,433 sô müge er mit gewalt .
0,434 daz quarter behalten .
0,435 swâ der abe kêret .
0,436 der die schuolær lêret .
0,437 sô lernent unrehte .
0,438 alle die knehte .
0,439 er sol rehte vore varen .
0,440 alsô die guoten gemaren .
0,441 die rehte ze ackere wellent varen .
0,442 er sol sînem gemaren gân .
0,443 als er ez im selben hât getân .
0,444 mit einem rinde und mit einem knehte .
0,445 daz hoeret zuo dem rehte .
0,446 daz im sîn gemare .
0,447 alsô rehte mit vare .
0,448 sô ne wirdet der hagel noch der schûr .
0,449 niht ir nâchgebûr .
0,450 swaz der man wile begân .
0,451 dâ sol er reht zuo hân .
0,452 swie geswâslîchen er ez tuot .
0,453 dâ ist daz reht vile guot .
0,454 wande ez ist gote wole kunt
0,455 . êr . wir gerüeren den munt .
0,456 rehte weiz er in den muot .
0,457 ez sî übel oder guot .
0,458 von diu schulen wir uns bewaren .
0,459 daz wir vile rehte gevaren .
0,460 wan dô got bileden began .
0,461 den allerêrsten man .
0,462 nû sehet welich ein wunder dâ geschach .
0,463 daz er dem jungesten under diu ougen sach .
0,464 dâ mit hât er alle die vervaren .
0,465 die wurden oder noch werdent geboren .
0,466 von diu weiz er mannegelîches list .
0,467 vile wole wie er getân ist .
0,468 hân wir dâ heime ein vaz .
0,469 unde besliezen wir daz .
0,470 wie mohte uns werden verseit .

0,471 swaz wir dâr in hân geleit .
0,472 alsô stât ez umbe daz leben .
0,473 daz uns got hât gegeben .
0,474 wande er ez dâr in hât geleit .
0,475 vore im ist niht verseit .
0,476 vore im ist niht verborgen .
0,477 dâr zuo hoerent sorge .
0,478 daz wir uns wole bewarn .
0,479 und vile rehte gevarn .
0,480 wande mohten nû wir alle die ervarn .
0,481 die ie wurden geboren . –[...]
0,482 alle zesamene bringen .
0,483 die ne mohten got nihtes bedwingen .
0,484 daz er dâ mit wære .
0,485 dâ man unrehte vüere .
0,486 swie eine daz mennische gestât .
0,487 dâ ez daz reht begât .
0,488 ez bedarf nieman lâzen sehen .
0,489 ez hât einen guoten nâchjehen .
0,490 got selbe dâ stât .
0,491 dâ ez daz reht begât .
0,492 er ez hoeret er ez sihet .
0,493 er es iemer nâch jihet .
0,494 er sterket ez dâr zuo .
0,495 daz ez daz reht getuo .
0,496 von diu sô schulen wir uns bewarn .
0,497 daz wir vile rehte gevarn .
0,498 der ist des rehtes meister .
0,499 daz sol sîn der priester .
0,500 der ist unser liehtvaz .
0,501 der bezeichnenet daz .
0,502 daz er vore uns sol sîn .
0,503 mit aller slahte güeten .
0,504 er sol uns lêren . unde sagen .
0,505 den rehten spiegel vore tragen .
0,506 er sol uns lêren .
0,507 wie wir unser gewæte kêren .
0,508 innen von den sünden .
0,509 ûzen von den schanden .
0,510 wile er priesterlîchen leben .
0,511 er sol driu reht haben .
0,512 einez ist der güeten .
0,513 daz ander der diemüeten .
0,514 daz dritte ist diu minne .
0,515 sô wirbet er mit sinnen .
0,516 ez ist rehte daz lei .
0,517 den selben sîte eige .
0,518 sô im der priester vore trage .

0,519 daz er im vile rehte nâch trage .
0,520 sô mügen si beidesam gân .
0,521 hin vüre den himel küninc stân .
0,522 der lei unde der priester .
0,523 got der ist ir meister .
0,524 der rehte sint noch driu .
0,525 durch nôt erlîden wir diu .
0,526 undankes oder dankes .
0,527 dâr an ist niht wankes .
0,528 wir wurden eines geboren .
0,529 wir müezen anderstunt vervâren .
0,530 wir müezen dritten stunt erstân .
0,531 daz ist rehte getân .
0,532 gesach got den man .
0,533 der sich des verdenken kan .
0,534 wie verre er dâ gelobet stât .
0,535 der daz reht begât .
0,536 in lobet der himelherre
0,537 selbe vile verre .
0,538 er heizet si alliu sîniu kint .
0,539 die daz reht wûrkente sint .
0,540 er heizet si varen gelîche .
0,541 ze sînes vaters rîche .
0,542 gewîht joch gesegenet .
0,543 dâ ne vûrhtent si den tût .
0,544 dâ vindent si êwîclich lieht .
0,545 dâ ne werret in niht .
0,546 dâr müezen wir allensament komen .
0,547 die die toufe habent genomen .
0,548 wande wir von dem rehte kumen .
0,549 nû sprechet alle “âmen .”